



# Sambutan Ambang 2009

Lebih 3,000 kakitangan dan pelajar Universiti Malaysia Perlis telah menghadiri Sambutan Ambang 2009 yang diadakan di perkarangan Kolej Kediaman Tun Ghafar Baba, Seberang Ramai, Kuala Perlis, pada malam 31 Disember 2008 lalu. Program yang melibatkan semua warga UniMAP ini diadakan bagi memberi ruang kepada mereka untuk menyambut kedatangan tahun baru 2009. Ia diadakan secara sederhana tetapi memberi impak yang berguna kepada pelajar dan kakitangan Universiti ini.

Program sambutan ini dimulakan dengan ucapan dan amanat daripada Naib Canselor. Bagi Naib Canselor UniMAP, Y.Bhg. Brig. Jeneral Dato' Prof. Dr. Kamarudin Hussin, sambutan tersebut bertujuan untuk mengenang kembali nostalgia tentang saat pahit, manis dan kejayaan yang dicapai oleh UniMAP di sepanjang tahun 2008. "Saya berharap agar segala memori tahun lalu, dapat menyedarkan kita tentang kekuatan dan kelemahan diri. Oleh itu, gunakanlah pengalaman itu sebagai pedoman untuk kita mencapai lebih banyak kejayaan di masa akan datang." Pepatah ada menyatakan "Semalam adalah sejarah, hari ini adalah hakikat dan esok adalah masa depan". Justeru, janganlah kita terleka dengan cerita dan kejayaan lalu hingga membuatkan kita alpa untuk melakukan persiapan di masa akan datang," katanya ketika menyampaikan ucapan aluan pada majlis tersebut.

Pelbagai persembahan kebudayaan serta nyanyian dan nasyid telah dipersembahkan oleh pelajar-pelajar dan kakitangan UniMAP. Gabungan ini, ditambah dengan kehadiran semua warga UniMAP pastinya ia akan menjadikan semangat perpaduan dan silaturahmi antara mereka bertambah kukuh. Semangat sebegini sudah amat diimpikan oleh Universiti ini melalui program-program yang dianjurkan.

Pada majlis itu juga, Y.Bhg. Naib Canselor turut melancarkan "Program UniMAP Juara Perpaduan". Ia kemudiannya diikuti dengan bacaan ikrar yang diketuai oleh Yang DiPertua Majlis Perwakilan Pelajar UniMAP, Abdul Malek Abdullah. Melalui program ini UniMAP beriltizam untuk menjadi contoh kepada agensi dan IPT lain dalam membentuk perpaduan yang jitu di kalangan warganya. Kemuncak acara pada malam itu adalah pengiraan detik tahun baru yang diketuai Y.Bhg. Naib Canselor sendiri dan diikuti dengan persembahan bunga api.



Oleh : Nurul Aida Othman (aidaothman@unimap.edu.my)

Oleh : Mustaffa Ismail (mustaffa@unimap.edu.my)

